

EN MEMORIA



Tullio Dal Farra-Decrusch 1931 – 2021

Il Tullio ei naschius ils 12 da fenadur 1931 sco 7avel da 13 affons e carschius si a Cirvoi ella provinzia da Belluno (Italia). Il bab Giovanni Maria stueva gia da gliez temps ir egl jester a fadigar il paun da mintga di. La mumma Anna restava anavos cun ina casa fullanada e per insumma surviver stueva ella aunc tgirar in pign menaschi agricol.

Gia cun 14 onns ha Tullio empriu il mistregn da miradur a Cortina d'Ampezzo.



Cun 18 onns eis el gia serendius en Svizra per luvrar ed ha priu dimora tier ina sora el Tessin. Ils onns 1957 luvrava in aug sco stagiunari a Sedrun tier l'interresa Murer SA. Entras quei aug ha el empriu d'enconuscher la Tresa Decrusch.

Il schaner 1959 ein Tresa e Tullio maridai e priu dimora el Tessin/Mendrisio; leu ei era la feglia Loretta naschida. Il medem atun ei Giusep Decrusch, il bab dalla duna Tresa sedisgraziaus a Sedrun.

Tullio 1958

Igl atun 1960 ei la famiglia Dal Farra-Decrusch returnada a Sedrun e secasada en Tgès'alva. Communablamein han els surpriu ils 6 orfans da bab e mumma. La Rossli, la tiarza veglia sora dalla Tresa, haveva pér gest cumpleniu igl 16avel anniversari ed ha stuiu serender egl jester per far in emprendissadi. El decuors dils proxims onns ei la famiglia da Tullio carschida sin 4 affons. Suenter la Lorella ein la Marina, la Patrizia ed il fegl Tarcisio naschi. Sper ils 4 agens affons han Tresa e Tullio tgirau e dau albiert als sis fargliuns Decrusch entochen che tutt ein stai maiorens e terminau in emprendissadi.

Sch'ins examinescha mo in tec igl affar da quei temps, san ins s'imaginar tgei sustegn minimal che quella famiglia ha retschiert dil maun public. Ord vesta hodierna eis ei strusch pusseivel da giudicar la prestazion e sacrifici che Tullio e sia dunna Tresa han fatg pils 6 fargliuns Decrusch. Tgei fuss ei succediu cun ils 6 orfans, sch'ils conjugals Dal Farra-Decrusch havessen buca giu quella forza fisica e psica da surpender quei immens buordi! Igli onn 1967 ha la famiglia Dal Farra affittau ina habitaziun sin Gionda. Cun bardeghiar quei tec ch'els possedevan han els abandunau per adina la Tges`alva..

Quater onns pli tard 1971 han els acquistau, era sin Gionda nr. 19, la tgèsa paterna, la quala ei daventada igl onn 1982 in'unfrenda dad in incendi. Cun bia cletg han Tullio e Tresa saviu sespindrar sesez.

Il medem onn ei la casa veginida baghegiada da niev. Naturalmein haveva Tullio exequiu sez biara lavur. Quella fageva el exact. Mintgaton exequeva el certas lavurs senza dumandar ils architects.

El decuors digl onn 1977 ein Tullio cun siu fegl Tarcisio vegni naturalisai en Tujetsch. Al cantun ha el stuiu contribuir ina taxa da frs. 1'700.00. Sin proposta dad in convischin ha la vischnaunca da Tujetsch deliberau el dad ina taxa communalala sco renconuschienscha pil prestau.

Tullio Dal Farra, geboren in Belluno (Italien) am 12. Juli 1931, Sohn des Dal Farra, Giovanni Maria und der Anna, geborenen Dal Farra, italienischer Staatsangehöriger, zuständig nach Belluno, verheiratet, Maurer, in Sedrun.

Die Einbürgerung erstreckt sich auf das Kind Tarcisio, geboren in Ilanz am 8. Januar 1966.

Einbürgerungsgemeinde: Tujetsch.

Einbürgerungstaxe: Fr. 1700.

Per tut ils immens merets havess il migeivel Tullio sco era la dunna Tresa meritau ord mia vesta il burghéis d'honur.

Tullio ei era staus in fideivel survient. El ha luvrau entochen la pensiun (1996) sco miradur tier la firma Murer SA ed igl unviern per part tier las pendicularas.

Tullio era ina fetg migeivla persuna. El era in um che schazegiava la cumpignia, tgirava quella e deva aunc dètg bugen in scart troccas. Tuts Tuatschins e Tuatschinas enconuschevan il Tullio ch'era beinvegnius ed el sesenteva ord mia vesta da casa en Tujetsch.

En siu luvratori haveva el adina enzatgei da trafficar e da zambergiar. El scaffevo era novs bateglis. Tuttas uisas da maschinas fascinavan el. La maioritad dallas reparaturas vid sia casa liquidava el sez.

El carezava era la natira. Aunc els onns fageva el mintgadi spassegiadas e contemplava fauna e flora. Ei devi strusch ina plonta, flura, utschals ni bulius ch'el enconuscheva buca.



Il Tullio era ina persuna fetg inschignusa

Era suenter che sia dunna Tresa haveva stiuu prender dimora ella casa d'attempai (S. Vigeli e pli tard ella casa Puntreis a Mustér) ed ei spartida ils 12 da fevrer 2017, ha Tullio cun agid dalla famiglia e cun sustegn da persunas dal vitg astgau guder sia pensiun a casia entochen il davos di.

Ils 4 affons e partenaris culs 6 biadis ed in sutbiadi eran la luschezia da Tullio. Ses descendants han visitau beinsavens il tat e basat. Era las quinadas han stimau il Tullio e silmeins ina gada all'jamna s'annunziava ina ni l'autra per telefon.

Cuort avon la disgrazia havevel jeu entupau el sillla staziun, nua ch'el fageva stediamein pintgas spassegiadas. Tier quei discours ha el schau sentir che l'epidemia hagi mudergiau el, cunquei ch'el sco aunc biars auters attempai seigien per part isolai.

Sche l'epidemia havess buca restrenschiu las scuntradas, havess ina roschada convischinas e convischins accumpignau bugen il Tullio al davos viadi. Tia demanonza ei stada per nus tuts in muossavia. Tullio stai bein e ruaussa en pasch.

Tumaisch Valier

